

forma de protesta. Saiâ o tempo, comm'a-o sòlito, a dine comme sta brutta vicenda a finiâ. De seguo, A Compagna a saiâ presente in difeiza da nòstra coltua e de nòstre reixe.

Parlemmo òua do nòstro Sodaliçio. L'urtima manifestaçion do 14 de luggio inta sala do Consegetto a Paxo, co-o muxicista svissero Marco Zappa, insemme a Renata Stavrakakis e Daria Zappa, o l'è stæto pròpio bello: tanta a gente e tanti i complimenti pe-a qualitæ do conçerto. E ancon in rigraçiamiento a-a direcion do Paxo pe-a seu grande disponibilitæ in sciâ quæ poemo contaghe de longo. Finîa a stæ, l'apontamento o l'è co-i "Martedì in Compagna" che ripigian martedì 27 de setembre co-a doctoressa Anna Maria Dagnino, asesôa (o feminin o l'è into scito da Provinsa e a mi o me piaxe!) a-a coltua e a-o turismo ch'a ne parliâ de cös'a l'à fæto e cös'a faiâ pe o ben da nostra tæra. V'aspetto tutti! E chi m'è cao asci anonçiâ a nascita da neuva iniçiatiua (che, a dî a veitæ, a ne repiglia unn-a antiga): i "Venerdì da Compagna a-e Vigne". Tutte queste cöse, e anche de ciù, poei lezile inta "Vitta do Sodalissimo", tra e urtime pagine de questo Boletin.

Primma de concludde, veuggio aregordâ a tutti i sòcci che o neuvo Statuto da Compagna o l'è stæto stanpòu e che ognidun o peu retiâ a seu còpia in Sede (ma dæ 'na telefonâ primma de vegnî!) ò, meglio, a-i "Martedì" a Paxo e a-e atre manifestaçioin che faiemo. Naturalmente o Statuto o peu ese lezûo anche in sciò scito da Compagna. Chi m'è cao riportâ quello ch'o reçita l'articolo quinto: *I Sòcci son inpegnae a tegnî âto o nomme de Zena e da Liguria e a agiutâse metendo in pratica o spirito da Compagna inte tutte e ocaxoin, concorindo segondo e proprie poscibilitæ a persegoî i scopi de l'Asociaçion e pe-o ben da propria taera*. Ciù ò meno inte sta forma, st'articolo chi

o l'è presente inte tutti i Statuti partindo da-o secondo (publicòu o 19 dexembre do 1954). Ma cöse veu dî "metendo in pratica o spirito da Compagna"? I nòstri Paddri fondatoî àn vosciuo che A Compagna e se refesse a-e Compagne medievali¹ che ean un sodaliçio dove i aderenti doveivan agiutâse tra de liâtri pe razonze o fin stabilio, ch'o poeiva ese commerciale, sociale, de difeiza, e via discorindo. Ecco: pægio dev'ese ancheu: o scòpo da Compagna o l'è quello de tegnî erto l'ônò de Zena e da Liguria, de seu tradiçioin e de seu parlæ; de ese 'na testimoniansa viva de reixe do nostro pasòu: questo no bezeugna mai ascordalo. Però, pròpio perché 'n'asociaçion a l'è fæta de personn-e (e niatri semmo tutti volontâi e prestemmo a nostra opera de badda), peu capitâ che quarcösa a no gie pò-u verso giusto e che quarche sòccio o pòssa sentise trascuròu ò adreitûa ofeizo. L'è ciæo che tutti poemo fâ di eroî, ma l'è, ciù che ciæo, seguo che nisciun òu fa pe despeto e tutti son pronti a rimediâ. Mette in pratica o spirito da Compagna o veu dî anche questo: savei che tra niatri sòcci gh'è do bon e a ciù grande voentæ de no creâ problemi e, sorviatutto, de risòlvili.

P.S. Questo Boletin o creuve anche dexembre, o meize de Natale (ò Dênâ, comme diva i vegi), o tempo di regalli. E aloa diggo a-i nònni e a-e nònne (i mesiai e e madonæ): perché no regalâ a-i neveti e a-e nesette l'iscriçion a-a Compagna? Son solo 15 euro l'anno (ciù i 10 pe l'iscriçion), ma o segnale che se da de fâ intrâ di zoeni inte l'asociaçion, no ghe dinæ da poeilo pagâ!

1) Pe saveine de ciù poei leze o bello tòcco do nostro gran cançelê Maurizio Daccà "L'origine della Compagna cittadina", publicòu comme premissa a-o Statuto.



Il chiostro millenario della Basilica delle Vigne.